

06 OCT 2000

MCA-Ekonomi

MCA ANJUR PERSIDANGAN K-EKONOMI

KUALA LUMPUR, 6 Okt (Bernama) -- MCA akan menganjurkan persidangan sehari mengenai trend-trend ekonomi yang sedang muncul dengan maklumat menjadi sumber utama ekonomi.

Naib Presiden MCA Datuk Chua Jui Meng berkata persidangan bertema "Pengetahuan Dan Abad Ke 21" akan memberikan peluang bagi rakyat Malaysia untuk memahami dengan lebih baik ekonomi yang didorong oleh pengetahuan (K-ekonomi).

Chua, yang juga pengerusi jawatankuasa penganjur persidangan itu memberitahu pemberita di pejabatnya yang persidangan itu akan berlangsung di Sunway Lagoon Resort Hotel pada 17 Okt.

Perdana Menteri Datuk Seri Dr Mahathir Mohamad bersetuju untuk merasmikan persidangan itu dan menyampaikan ucapan sementara Presiden MCA Datuk Seri Dr Ling Liong Sik akan menutup persidangan itu.

Beliau berkata, persidangan itu akan membincangkan topik bertajuk "Pengetahuan - Kuasa Di Sebalik Ekonomi Baru" dan "Perbatasan Baru Ekonomi Pengetahuan " dan masing-masing akan dipengerusikan oleh Pengerusi Institut Kajian Strategik Dan Antarabangsa (ISIS) Tan Sri Dr Noordin Sopiee dan Penasihat Korporat Sunway Group Tan Sri Ramon Navaratnam.

Antara penceramah di persidangan itu ialah Bill Anderson daripada Microsoft Corp, Presiden Mimos Berhad Tengku Datuk Dr Mohd Azzman Shariffadeen, Ketua Pegawai Eksekutif financialzoo.com Tong Kooi Ong dan Ketua Pengarah Kesihatan Tan Sri Dr Abu Bakar Suleiman.

Chua berkata, mereka yang berminat menyertai persidangan itu boleh mendapatkan borang pendaftaran di sekretariat projek di Motivation Alliance Sdn Bhd, Bilik 11, Aras 2, Malaysia International Exhibition and Showroom (Mines), Seri Kembangan atau mendaftar secara online di [www.K-economy2000.com.my](http://www.K-economy2000.com.my). Yuran penyertaan ialah RM250 setiap orang.

-- BERNAMA

NHA AZZ PR